


2. 05

AWIG - AWIG DESA ADAT TRIBHUWANA



**DESA KUSAMBA
KECAMATAN DAWAN
KABUPATEN KLUNGKUNG
TAHUN 2007**

PIDAGING
MAKA BANTANG AWIG - AWIG
DESA ADAT TRI BHUWANA

MURDA CIITTA	1
PRATAMA SARGAH : ARAN LAN WAWIDANGAN DESA ADAT	2
DWITYA SARGAH : PATITIS LAN PAMIKUKUH	2
TRITYA SARGAH : SUKERTA TATA PEKRAMAN	3
Palet 1. Indik Warga	3
Palet 2. Indik Prajuru Desa	6
Palet 3. Indik Kulkul	8
Palet 4. Indik Paruman	8
Palet 5. Indik Druwen Desa	10
Palet 6. Indik Sukerta Pamitegep	10
Kaping 1. Karang Lan Tegal	10
Kaping 2. Kekayonan	11
Kaping 3. Wawangunan	12
Kaping 4. Wawalungan	13
Kaping 5. Bhaya	13
Kaping 6. Panyanggran Banjar	14
CATUR SARGAH : SUKERTA TATA AGAMA	15
Palet 1. Indik Dewa Yadnya	15
Palet 2. Indik Rsi Yandnya	19
Palet 3. Indik Pitra Yadnya	19
Palet 4. Indik Manusa Yadnya	24
Palet 5. Indik Bhuta Yadnya	24

PANCAMA SARGAH	: SUKERTA TATA PAWONGAN	26
	Palet 1. Indik Pawiwahan	26
	Palet 2. Indik Nyapian	28
	Palet 3. Indik Sentana	29
	Palet 4. Indik Warisan	31
SAD SARGAH	: WICARA LAN PAMINDANDA	34
	Palet 1. Indik Wicara	34
	Palet 2. Indik Pamindanda	35
SAPTAMA SARGAH	: NGUWAH-NGUWAHIN AWIG-AWIG	37
ASTAMA SARGAH	: SAMAPTA	37

MURDHA CITTA

Om Swastiastu. Om Awighnamastu Nama Sidham.

Melarapan saking Asung Kerta Lagraha Ida Sang Hyang Widhi Wasa, ngwentenang kehuripan sekala niskala, ring Bhuwana Agung lan Bhuwana Alit manut dresta, desane wantah pawakan pasayuban krama desa rawuhing kulawarga pawongania. Desane kemanggehang Bhuwana Agung, Pawongania soang-soang pinaka Bhuwana Alit.

Sotaning bhuwana Agung, desane wantah pawakan bhuwana maurip jangkep saha Tri Hita Karananya luire :

Ha. Prahyangan sahananing kahyangan, panyiwian desa genah Naryana Ida Sang Hyang Parama Wisesa, pinaka Atma desane.

Na. Palemahan, tanah kakuwuban desa sinanggeh stula sariraning desane.

Ca. Pawongan, krama saha warga desa maka sami maka pawakan Tri Kaya, Mawanan desane sida molah maprawerti.

Adung patemoning bhuwana kalih malarapab cantu jagathita sinanggeh murdhaning prayojana pangriptaning Awig-awig Desa Adat.

Pinaka putusing paseban, wastu prasida prayojana mami kabeh prasana angidep muah amagehaken kadi ling ing awig-awig iki.

2

PRATAMA SARGAH ARAN LAN WAWIDANGAN DESA ADAT

Pawos 1

- (1) Desa adat puniki mawasta Desa Adat Tri Bhuana.
- (2) Jebar kakuwub wawidanganyane mawasta nyatur :
 - ha. Sisi kangin ring Desa Adat Pesinggahan
 - na. Sisi kauh ring Desa Adat Bias
 - ca. Sisi kaja Subak Pesinggahan.
 - ra. Sisi kelod ring Segara (Selat Badung)
- (3) Desa Adat puniki kawangun antuk karang desa utawi gebogan krama wantah abanjar, sane kasinanggeh Banjar Tri Bhuwana.

DWITYA SARGAH PATITIS LAN PAMIKUKUH

Pawos 2

- (1) Desa adat Tri Bhuana ngemanggehang pamikukuh minakadi :
 - ha. Pancasila.
 - na. Undang-Undang Dasar 1945.
 - ca. Tri Hita Karana manut tata cara Agama Hindu.

Pawos 3

- (1) Luwir Patitis Desa Adat Tri Bhuana
 - ha. Mikukuhin miwah ngrajegang Agama Hindu.
 - na. Ngutamayang tata prawertine maagama.
 - ca. Ngrajegang kasukertan desa saha pawonganyane sekala lan sekala.

TRITYA SARGAH SUKERTA TATA PAKRAMAN

Palet 1

Indik Warga

Pawos 4

- (1) Sane kabaos warga desa inggih punika sahananing kulawarga sane maagama Hindu, saha ngemong wiadin tan ngemong karang desa, jumenek ring wawidangan desa, saha satinut ring awig-awig muang pararem desane.
- (2) Krama desa inggih punika warga desa sane sampun jangkep alaki rabi wiadin naenin alaki rabi nyungsung Kahayangan Desa saha satinut ring awig-awig lan pararem desa.
- (3) Sajaba punika sinanggeh tamiu, sane kabinayang dados kalih pahan inggih punika : tamiu sane maagama Hindu wiadin sane maagama tiosan.
- (4) Kulawarga sane mawit saking Desa Adat Tri Bhuana nangin jumenek ring dura desa ngrereh pangupajiwa.

Pawos 5

Krama Desa Adat wenten 3 (tigang) pawos :

- (1) Krama ngrarep inggih punika krama sane kantun jangkep alaki rabi nagenah ring Desa Adat wiadin ring Dura Desa.
- (2) Krama tan ngarep, luire :
 - ha. Krama sane sampun werda mayusa 60 warga munggah.
 - na. Krama penyada, inggih punika krama sane sampun tan keni ayahan kagentos antuk sentananyane.
 - ca. Krama penyade, inggih punika krama sane ngentos ayahan krama ngarep wiadin tan ngarep tur sane kadadosang sekehe truna ring banjar.
 - ra. Krama sane cedangga sampun tan mrasidayang ngrereh pangupajiwa.
 - ka. Krama Pengele inggih punika Krama sane nenten naenin merabian.
- (3) Karama balu, inggih punika krama ngarep sinalih tunggil suami wiadin istrine seda, wiadin nyapian.

- ha. Balu makrambian, inggih punika balu sane maduwe sentana sane durung merabian.
- na. Balu putung, inggih punika balu sane tan maduwe sentana.

Pawos 6

(1) Ngawit dados krama :

- ha. Sangkaning ngamong wiadin tan ngamong karang desa.
- na. Mawiwit Pawiwahan.
- ca. Mawiwit wiadin ngrereh pangupa jiwa sajeroning palemahan Desa Adat turmaning jumenek ring Desa Adat Tri Bhuana.
- ra. Warga saking Desa Adat sampun wirang ring raga sane katinggal seda, sakewanten sampun mayusa 20 warsa.

(2) Panemaya tedun Makrama Desa

- ha. Melarapan antuk pawiwahan risampune tigang sasih taler rahina sangkep Galungan.
- na. Melarapan ngrereh pangupa jiwa saha jumenek sekirangnyane 6 sasih, patut katedunang makrama banjar, sawawaning saking sasudian guru wisesa miwah sasudian krama.
- ca. Melarapan antuk wisesa patilar rahayu warga desa tiosan tur sampun supeksa ring prajuru desa.
- ra. Soang-soang krama ring ajeng patut :
 1. Sumanggup nyawi Kahyangan Desa ring Desa Adat Tri Bhuwana.
 2. Tinut ring sedaging awig-awig, pasuara, miwah pararem desa.
- ka. Yening tios agamanyane tan kapatutang tedun makrama desa kewanten kedadosang medana punia tur masuka duka.

Pawos 7

Tategenan miwah swadarma Krama Desa Adat

(1) Tategenan Krama luire :

- ha. Krama ngarep keni urunan miwah ayahan mamungkul.
- na. Krama balu keni ayah manut kawonganyane :
 1. Balu putung lanang wiadin istri yening kakuubin olih sinalih tunggil keluarganyane nenten keni ayah – ayahan wiadin papeson.

2. Balu putung lanang wiadin istri sane megenah ring karang desa patut keni ayahan lanang wiadin istri kemaon.
 3. Balu makrambian, lanang wiadin istri sane madruwe sentana istri wiadin lanang sampun mayusan 20 warsa keni ayahan mamungkul.
 4. Balu nyapian, kadadosang luput papeson sakewanten keni ayahan, manut arah-arahan banjar, yening balu lanang ayahan lanang, balu istri ayahan istri.
- ca. Krama pangele, keni ayah-ayahan sekadi mareresik ring Kahyangan Desa, banjar lan tiosan manut ring kawigunan.

(2) Krama Desa Adat Kadadosang :

- ha. Mapuangkid utawi tan tedun ngemargiang ayah-ayahan luire :
1. Ritatkala mapawangun ring karang paumahan.
 2. Ritatkala ngemargiang Yadnya.
 3. Maleluasan.
 4. Matepetin anak sungkan selami asasih.
 5. ^{Sakit} Sakit, yening sampun kenak mangda masadok ring prajuru.
- na. Nyada mapiteges wusan keni ayah-ayahan risampun mayusa 60 (enem dasa) warsa munggah.
- ca. Mopog, ngetut ayahan saha papeson antuk brana, manut pararem majeng ring krama desa sane magenah ring dura desa.
- ra. Panyeledihi Nyade wiadin nyuksukin ayahin risampun mayusan 17 (pitulas) warsa.

Pawos 8

Kapatutang Krama Tamiu :

- (1) Krama Tamiu patut Madana Punia ring Desa manut pararem.
- (2) Krama Tamiu patut polih patias marupa pitulung ring sajeroning katiben bhaya.

Pawos 9

(1) Wusan dados Kram Desa, luire :

- ha. Sangkaning pinunas ngeraga, wiadin kesah ke dura desa.

na. Kanorayang, duaning sampun tan prasida ngesehin solah satata mamurug kecaping awig.

(2) Sane wusan makrama :

ha. Patut ngewaliang druwen desa.

na. Tan polih pah-pahan druwen desa.

ca. Tan polih pasayuban dajeroning ala ayu.

ra. Prade sangkaning rahayu, polih lekita bukti patilar saking prajuru desa.

Pawos 10

Laluputan

(1) Desa miwah Banjar mapeweweh laluputan ayahan wiadin pakenan-kenan ring sang Pandita lan Pinandita.

(2) Sajawaning prajuru desa sane pastika polih laluputan pemekasnyane.

ha. Para Pamangku Kahyangan Desa.

na. Krama sane sakit tahunan.

ca. Krama sane cendangga banget.

ra. Prade sane kasudi olih Desa Adat nanging tan polih petuas nyabran sasih.

(3) Ageng alit laluputan miwah bacakan sang luput kemanggehang ring pararem.

Palet 2

Prajuru Desa

Pawos 11

(1) Desa Adat Tri Bhuana kaenter antuk Bendesa Adat.

(2) Banjar kaenter antuk Klian Banjar

(3) Bendesa Adat lan Klian Banjar patut :

ha. Mawiwit saking Krama ngarep.

na. Kaadegang malarapan antuk pasudian olih paruman nyabran 5 warsa, sajawaning wenten parindik tiis tur kasudi malih.

ca. Maduluran upasakti ring Pura Desa.

7

Pawos 12

Bendesa Adat kasanggra antuk :

- ha. Petajuh Bendesa.
- na. Penyarikan.
- ca. Petengen.
- ra. Pemangku.
- ka. Sinoman.

Pawos 13

(1) Swadarmaning Bendesa Adat luire :

- ha. Ngenterang pelaksana sadaging awig-awig miwah pararem.
- na. Nuntun tur ngenterang krama rauhing warga desa ngupadi kasukertan manut patitis.
- ca. Maosin kalih niwakang pamutus arep wicara warga desa.
- ra. Maka duta matemuang bawos ring dura desa manut pararem.

(2) Prade prajuru desa iwang panglaksana keni pamidanda nikel ring kaiwangan soang-soang krama saha kangkat ^{KANDAPYANG} kakaryanang manut pararem.

LELEJARANU.

Pawos 14

(1) Patias utawi olih-olihan prajuru desa, luire :

- ha. Luput peson-peson.
- na. Polih tanding tengah.
- ca. Patias tiosan manut pararem.

Pawos 15

(1) Prajuru desa kagentosin riantukan :

- ha. Sampun putus sengkernyane wiadin sampun panemaya
- na. Seda
- ca. Kanorayang duaning iwang pemargi saha nilar sesana
- ra. Wit saking pakayunan wiadin pinunas ngeraga.

(2) Nganorayang wiadin ngentosin prajuru patut sajeroning paruman tur kaingkupin entu/ krama desa.

Palet 3
Indik Kukul
Pawos 16

(1) Kukul ring desa, luire :

- ha. Kukul Banjar.
- na. Kukul sekehe-sekehe.

(2) Tabuh tatepakan kukul desa :

- ha. Atuludan lamban, cihna tedun ngayah.
- na. Atuludan bulus, cihna katiben bhaya.
- ca. Ping tiga lamban, cihna Pawiwahan.
- ra. Ping enem lamban cihna seda.
- ka. Atuludan lamban selanturnyane, cihne nedunang krama.

Pawos 17

- (1) Kukul Desa wiadin Banjar tan wenang katepak yening tan sangkaning pituduh prajuru desa.
- (2) Sang nepak tan sangkaning pituduh patut digelis atur supekse maka buatan panepake. Yening tan sapunika sang mamurug patut kadanda manut pararem.
- (3) Kukul sekehe-sekehe tan kalugra ntawerin tengeran kulkui Desa / Banjar, prade mamurug patut kadanda manut pararem.

Palet 4
Indik Paruman
Pawos 18

(1) Paruman / Sangkepan ring Desa Adat Tri Bhuana wenten :

- ha. Sangkep Banjar kawentenang :
 1. Nyambran ngasasih maka cihna tan pa arah-arah duaning sampun tetep panemaya manut pararem.
 2. Napkala maka jalaran arah-arah manut wiguna.
- na. Paruman Prajuru kawentenang manut wiguna.
- ca. Sangkep seka-seka manut babuat.

(2) Paruman Desa wiadin Banjar madudonan sekadi ring sor :

- ha. Prasida kelaksanayang risampun katedunin antuk sang patut ngamiletin kacihnain antuk tengeran kulkul miwah mabusana adat saha tan kalugra makta gegawan.
- na. Maka sarana jagi ngawit kalaksanayang peparuman, Bendesa Adat patut nitenin krama saha riwusannyane nyacah d²dosan manut pararem.
- ca. Tan kalugra ngawetuang bawos banggras wiadin byuta, yen wenten asapunika keni pamidanda beya pecamil kadi dandaning nguman-uman ring sabha.
- na. Pamutus bebawos briuk sepanggul punika sane kemanggehang.

(3) Prade daging paruman tan kacumponin mangda Prajuru Desa ngilikang bebawos, saha putusannyane mangda kararemang antuk krama desa.

Pawos 19

(1) Sajeroning Paruman desa Bendesa Adat patut namyakang pemargin ngenterang Desa pamekas nganinin indik :

- ha. Munjuk lungsuring pekraman saha ayah-ayah sulur arta brana druwen desa.
- na. Rencana Prajuru nganinin usaha desa kapungkur.

(2) Pamutus paruman desa sinangggeh pararem maka pamitegep awig-awig desa.

Pawos 20

(1) Paruman Prajuru Desa kawenangang ngrincikang usaha desa kapungkur.

(2) Paruman Prajuru Desa tan kawenangang ngemedalang tategenan ring krama sadurung pamutus.

(3) Sahaning pamutus paruman Prajuru Desa, patut kadamyakang sajeroning paruman krama.

Palet 5
Indik Druwen Desa
Pawos 21

(1) Padruwen Desa Adat Tri Bhuana sekadi ring sor :

- ha. Kahyangan Desa luire :
 - 1. Pura Kahyangan Tiga
- na. Bale Banjar / LPD
- ca. Karang ayahan desa
- ra. Setra, sane kamanggehang manut dresta
- ka. Padruwen tiosan sane kapolihan selantur ipun.

(2) Olih-olihan Desa Adat Tri Bhuana luire :

- ha. Olih-olihan saking LPD
- na. Urunan Krama Desa Adat
- ca. Paican saking Guru Wisesa
- ra. Olih-olihan tiosan sane patut

Pawos 22

- (1) Nyabran pasangkepan desa, prajuru pangemong druwe, nguningayang pariindikan munjuk lungsuring praduwe ring krama desa.
- (2) Sakaluir druwen desa patut wenten ilikitannyane.
- (3) Tan kalugra ngadol wiadin nginsirang druwen desa yan tan kaingkupin antuk krama desa.

Palet 6
SUKERTA PAMITEGEP
KAPING 1
Karang Lan Tegal
Pawos 23

- (1) Krama desa pangemong karang ayahan desa patut ngewatesin karang inucap antuk pagehan / turus wiadin tembok mangda pakantenannyane asri.
- (2) Wates sisi kaler miwah kangin patut kakaryaning antuk sang ngamong karang ayahan inucap, sane mewasta gegaleng ke luan, sajawaning tanah

pecatu, tegal, carik wiadin praduwen ngeraga, sane kapihara watese sisi kelod miwah kauh, reh punika mawasta gegaleng kateben.

- (3) Prade karasayang pagehan/turus wiadin tembok inucap nglikadin, yan pada arsa panyandinge, kengin watese ngangge pinget, kewanten kesaksinin antuk prajuru desa wiadin pacihna pal saking Guru Wisesa.
- (4) Prade karang kabebeng mangda kautsahayang wenten margi sane katuntun olih prajuru desa.
- (5)

Pawos 24

- (1) Sahaning Krama Desa / Banjar tan kalugra :
 - ha. Ngalah-alah margi, tegal ayahan desa, karang desa.
 - na. Ngalah-alah tanah tegak Kahyangan, Setra, lan sakancan tegak sane kasinanggeh suci.
 - ca. Ngembahang toya kemargine lan karurunge wiadin kapumahan sane tiosan.
 - ra. Ngentungang wangke wewalungan katukade wiadin ke pakarangan / paumahan krama tios, tegal, muah carik napi malih ke tanah Kahyangan.

Ka. Nunjel sarwa awak-awakan sawa ring karang paumahan.
- (2) Sang mamurug kadi kecaping ajeng, patut keni pamidanda manut pararem, tur yening ngaletihin patut ngupakara sang kaletahan.

KAPING 2

Kekayonan

Pawos 25

- (1) Ngawit nandur kekayonan tanem tuwuh patut embangnyane sanistane adepa agung (175 cm) ngajeroang saking wates pakarangan, prade jantos ngeliwat wates patut katotor.
- (2) Yening wenten kekayonan ngungkulin, mawastu mayanin kapisaga, patut kawara antuk sang kaungkulin wiadin sang kabayanin malarapan paigum ring sang nruwenang kekayonan punika.

- (3) Prade sampun kawara taler tan wenten usaha sang nruwenang kekayonan punika, sang rumasa kaungkulin masadok ring prajuru, tur risampun kaparitas kalugra ngarebah wiadin notor kekayonan punika.
- (4) Prade wenten mayanin kapisaga, kapidadabin kadi ring sor :
- ha. Sang keni bhaya patut masadok ring prajuru desa.
 - na. Prajuru desa digelis maritatas indik kawentenan bhaya inucap saha nibakang pamindanda ring sang nruwenang kekayonan inucap.
 - ca. Yan sane kabayanin sinanggeh genah suci, pamidanda inucap patut kawewehin pamaryascita manut agama.
- (5) Krama desa patut ngamanggehang kawerdian tanem tuwuh sane ngawinang desa asri tur lestari.
- (6) Sahananing krama desa sane pacang ngarebah kekayonan sajeroning Desa Adat patut pamargine mangda nganutin pidabdab Guru Wisesa.

KAPING 3

Wawangunan

Pawos 26

- (1) Nyabran ngawangun krama patut :
- ha. Masadok ring prajuru, ping ajeng prade ngawangun nganinin wates.
 - na. Ngutsahayang mangde nganutin Asta Bhumi miwah gagulak Asta Kosali manut patitis niskala.
 - ca. Tan nyapcapin kapisaga.
- (2) Yan wawangunan jantos nyapcap napimalih tembok ring telengin wates ri sampun kawara tur kasadokang ring prajuru, sang nruwenang wawangunan wenang kadanda manut pararem, saha tembok inucap kakaonang wiadin sanistane mangda kakaryanang abangan manut paigum.

KAPING 4

Wewalungan

Pawos 27

- (1) Sahananing warga desa miara wewalungan, patut sayaga nitenin negul / nglogor mangda tan ngrusakin karang wiadin pabianan krama sios, napi malih jantos ngranjing ngaletihin Kahyangán.
- (2) Prade wenten wewalungan malumbar wiadin ngeleb ngrusakin karang / pabianan krama sios, risampun kawara taler tan katitenin, saha kasadokan ring prajuru, kadanda ngawaliang wit. Sane nruwenang wewalungan inucap keni pamidanda manut pararem, saha ngawaliang sahanan sane karusak muang naur panebas papiaran.
- (3) Prade jantos ngaletihin genah suci risampunan kaparitas antuk prajuru, yan mabukti, sang nruwenang wewalungan inucap patut keni pamidanda manut pararem, saha mrayascita genah punika manut pararem.
- (4) Krama desa patut ngayomin sarwa prani tan kapatutang maboros paksi, nuba ulam lan sapanunggilan ipun.
- (5) Sang mamurug kadi kecaping ajeng patut keni pamidanda manut pararem.

KAPING 5

Bhaya

Pawos 28

- (1) Pariindik bhaya luire : toya bhaya, agni bhaya, bayu bhaya, pratiwi bhaya, cora bhaya lan ripu bhaya.
- (2) Sang manggihin kahanan bhaya patut nepak kulkul bulus nunas pitulung manut pawos 16 (2) aksara na.
- (3) Prade ring desa kahanan bhaya sang malaksana wiadin kapatutannyane patut ngaturang upacara bhuta yadnya ring desa, saha sang malaksana katur ring guru wisesa. Prade sang ngawinang bhaya tan kakeniang upacara bhuta yadnya punika kamargiang oleh desa.
- (4) Prade wenten jatma mamisuh wiadin nguman-uman jatma sios, kakenein pamidanda beya pecamil tebasan prayascita.

Pawos 29

- (1) Yening wenten warga desa sane ngukubin jatma corah patut keni pamidanda pateh sekadi jatma corah punika, saha katur ring guru wisesa.
- (2) Prade wenten jatma ngarereh reramon minakdi daun kelapa, ron lan sapanunggilan ipun tan pasadok ring sang nruwenang, prade kacunduk (ketara) patut kapidanda manut pararem kadi dandaning maling saha katur ring guru wisesa.
- (3) Yening wenten jatma ngranjingin paumahan wiadin pakarangan rikala suwung mewastu sang madruwe kaicalan, wenang jatma inucap katuwekang antuk madewa saksi ring pura desa.
- (4) Mangda tan katuwekang manut ring ajeng sang ngranjingin paumahan jatma sios patut :
 - ha. Matengeran bebawos (makaukan)
 - na. Nyantos sang nruwenang rauh, wiadin masadok ring pangapit pinih tampek, maka buatan pangranjingane

KAPING 6

Panyanggan Banjar

Pawos 30

Krama desa rikala ngawangun karya ala ayu patut kasanggra antuk Banjar, luire :

- (1) Prade ngawangun pitra yadnya wiadin manusa yadnya manut pinunas sang mayadnya.
- (2) Pangrombo wiadin patedunan krama jantos ping tiga, langkung ring punika patut katuran pangu.
- (3) Pangu rikala pitra yadnya anut abot yadnya, prade saking semeng ngantos wengi, pangu manut pararem.

CATUR SARGAH
SUKERTA TATA AGAMA

Palet 1

Indik Dewa Yadnya

Pawos 31

- (1) Palinggih panyiwian sawidangan Desa Adat Tri Bhuana luire :
- na. Kahyangan tiga : Pura Desa (Puseh, Dalem, Bale Agung)
 - na. Pura Prajapati.
- (2) Rahina Ngusaba miwah piodalan soang-soang Kahyangan inucap kadi ring sor :
- na. Ring Kahyangan Desa luire :
 1. Ngusaba ring Pura Desa (Puseh, Bale Agung) rikala Rahine Purnama Sasih Kasa
 2. Piodalan ring Pura Desa (Pura Puseh, Bale Agung) rikala Rahine Buda Cemeng Wuku Langkir.
 3. Pura Dalem rikala Rahine Saniscara Tumpek Wuku Wayang.
 4. Pura Prajapati rikala Rahine Saniscara Tumpek Wuku Wayang.
- (3) Pangaci ring Pura inucap manut sastra agama.
- (4) Pangempon soang-soang pura manut dresta kadi ring sor :
- na. Pura Puseh, Dalem, Bale Agung kaempon antuk Desa Adat Tri Bhuana.
 - na. Pura Prajapati kaempon antuk tigang Desa Adat luire : Desa Adat Tri Bhuana, Desa Adat Bisa lan Desa Adat Pancingan.

Pawos 32

Indik Kaicalan Ring Pura Kahyangan

- (1) Prade wenten druwen pura sane ical, prajuru pura / pemangku patut ngaturang kaicalan punika ring guru wisesa.
- (2) Yan prade sang mamandung druwen desa sane ical tan kacirian, prajuru patut namyakang ring krama sajeroning paruman.

- (3) Yan sang mamandung kacirian, druwen pura sane ical kasinanggeh suci, patut sang mamandung ngewaliang druwen pura inucap, tur naur pala kerta miwah pamrayascita manut agama.
- (4) Yaning sang mamandung nenten sumanggup nganutin sekadi ring ajeng, prajuru digelis ngaturang ring guru wisesa.
- (5) Yan mawiwit saking masilur, prajuru digelis namyikang ring krama.

Pawos 33

- (1) Ring Pura soang-soang patut ngadegang pamangku.
- (2) Ngadegang pamangku manut dudonan :
- ha. Turunan wiadin ngwaris.
 - na. Nyanyian wiadin masemurang.
 - ca. Majalaran antuk sasudian desa.
- (3) Tan kawenangang kaadegang pamangku, luire :
- ha. Cedangga.
 - na. Sang sapa sira ugi sane tan kapatutang manut pararem.
 - ca. Sakit ila, ayan, buduh.
 - ra. Sang maparisolah tan becik.
- (4) Prabeya ka pamangkuan :
- ha. Ngawintenin kamedalin saha kalaksanayang olih sang ngadegang makadi krama desa, wiadin pangempon pura soang-soang.
 - na. Prade riwekas Pamangku Desa seda, prabeya pitra yadnya kamedalin saha kasanggra olih desa manut pararem.
- (5) Pamangku patut ngamanggehang sesananing pamangku manut sastra agama.

Pawos 34

- (1) Swadarmaning Pamangku luire :
- ha. Ngenterang upacara piodalan ring Kahyangan wiadin ring soang-soang paumahan krama.
 - na. Tan wenang salab-sulub, yang murung wenang pamangku inucap nyepuhin raga.
 - ca. Prade sinalih tunggil pamangku kapialangan wiadin sebel, kenging nuur pamangku siosan.

ra. Samalih yan sampun ngayah tigang rahina ring pura, prade wenten kaluwargannyane seda, pamangku inucap tan keni cuntaka, sakewanten pamangku tan dados budal selami piodalan.

(2) Patias wiadin olih-olihan pamangku luire :

ha. Sarin canang manut pararem.

na. Luput pakaryan krama miwah reramon.

ca. Olih-olihan sios manut pararem.

Pawos 35

(1) Pamangku pengarep ring pura punika patut nibakang pituduh majeng pamangku siosan sane sareng ngerombo yadnya.

(2) Pamangku sane sareng ngerombo yadnya, wenang polih pah-pahan manut pararem.

(3) Yan wenten pamangku Kahyangan Desa keni ujar ala, ulah ala, pamangku inucap patut maprayascita, kesepuh olih Krama Desa Adat sane ngawidangin, tur kapuput olih Sang Sulinggih, sane mojar ala keni pamidanda manut pararem.

(4) Yening wenten pamangku amumpang paraning laku patut pamangku inucap kararyanang tur naur pala kerta manut pararem.

Pawos 36

(1) Yan prade wenten pamangku ngalap rabi sangkaning rahayu, pamangku inucap patut kasepuh tur kaupesaksi olih desa saha prabeyanyane kamedalin olih desa manut pararem.

(2) Sadurung masepuh pamangku inucap tan kapatutang ngenter yadnya.

Pawos 37

Kasukertan Kahyangan Ring Desa

(1) Sane tan kalugra ngranjing kapura luire :

ha. Sang katiben cuntaka wiadin sebel raga luire :

1). Sangkaning ngeraja selami durung mabersih.

2). Sangkaning madruwe putra wiadin kruron sajeroning 42 rahina.

- 3). Sangkaning pangantenan sadurung mabeakala.
- 4). Sangkaning kasedayan manut sengker.
 - na. Panak babinjat sadurung kaupacara.
 - ca. Makta sahananing sane kasinanggeh ngeletehin manut sastra agama.
 - ra. Wewalungan, sajawaning rikala mapepada.
 - ka. Mabusana tan manut kadi tata caraning ngeranjing ka pura.
 - da. Anak alit sadurung tigang sasih.
 - ta. Warga desa tiosan sadurung polih wak-wakan saking prajuru.
- (2) Busana ngranjing ka pura patut nganutin dresta sane kamanggehang manut pararem.
- (3) Parilaksana sane tan kawenangan ring pura, luire :
 - ha. Mabawos sane kasinanggeh wak parusya, wak capala.
 - na. Makoratan / mabacin, mawarih, masanggama.
 - ca. Masumpah wiadin macoran sajawaning pituduh prajuru desa.
 - ra. Mecikang wiadin ngentosin busana, sajawaning pandita miwah pinandita.
 - ka. Munggah tedun ring palinggih sajawaning pitiduh prajuru desa.
 - ca. Mayuda napi malih ngemedalang rah.
 - ta. Macecepin anak alit.
- (4) Sang mamurung kadi kecaping ajeng patut keni pamidanda manut pararem saha pamrayascita manut agama.

Pawos 38

- (1) Yan wenten jatma karauhan ring pura, kengin kapintonin prade rumasa kasumangsayan, yan tan wiakti jatma inucap kasisipan manut pararem.
- (2) Prade Kahyangan kahanan durmenggala, minakadi katiben bhaya, pamangku patut digelis nyadokang ring prajuru mangda marumang krama desa tur ngewentenang upacara sepatutnyane.

Palet 2

Indik Resi Yadnya

Pawos 39

- (1) Sang pacang mideg pandita patut masadok ring prajuru desa kalih Parisadha Hindu Dharma.
- (2) Prajuru desa patut nyaksinin upacara inucap, saha namyakang ring paruman desa indik Kasulinggihan Ida.
- (3) Krama desa patut ngaturang ayah sapemadeg miwah ring panglepas Ida riwekas, katuntun olih prajuru.

Pawos 40

- (1) Sang Sulinggih ngutsahayang ngriyining ngrayuning ring wawidangan Desa Adat wawu muputang yadnya kadura desa.
- (2) Rikala wenten yadnya desa sane kapuput olih Sulinggih, krama sami patut nyanggra yadnya punika sane katuntun olih prajuru.

Palet 3

Indik Pitra Yadnya

Pawos 41

Dudonan pamargin pitra yadnya sekadi ring sor :

(1) Seda :

- ha. Mendem
- na. Makinsan
- ca. Atiwa-tiwa
- da. Ngeroras

- (2) Risampun puput ngalaksanayang upacara Pitra Yadnya kalanturang antuk ngalinggihang Dewa Hyang.

Pawos 42

Swadarmaning lan tategenan krama prade wenten sinalih tunggil warga seda :

- (1) Sang kaduhkitan patut nyadokang ring Klian tur nunas tatimbang ring kawentenannyane.

(2) Prajuru Banjar patut :

ha. Maritatas pamargin sang kaduhkita, napike pacang kapendem, makinsan riin wiadin kaabenang.

na. Nedunang krama mangda nyanggra karya inucap kadulurin panyembrama saka sidan.

(3) Krama Banjar patut tedun nyanggra karya punika manut dresta.

Pawos 43

Pamargin mendem sawa kapidabdabin sekadi ring sor :

(1) Sane seda durung maketus, patut kapendem ring setra pamajangan tan wenang nyuarayang kulkul.

(2) Sane seda sampun maketus macihna antuk kulkul banjar, kapendem ring setra agung tur katedunin antuk krama banjar.

(3) Sapa sira ugi sane maagama Hindu tur tan makrama banjar, yening pacang mendem ring setra adat patut keni pananjung batu manut pararem.

Pawos 44

Pamargin panyanggran banjar sekadi ring sor :

(1) Soang-soang krama banjar patut ngamedalang patus marupa jinah sepenghargan akilo beras.

(2) Ngrombo sahananing karya inucap saha kasarengin antuk krama sane rauh nyaksiang katuntun olih prajuru banjar.

(3) Sami krama banjar patut ngater ke setra jantos pamendemane puput.

Pawos 45

(1) Tan kapatutang nyekeh sawa langkungan ring 7 (pitung) rahina, tur patut polih pagebagan manut paetangan Klian Banjar.

(2) Tan kapututang nginapang bangbang.

(3) Prade wenten seda rikala Piodalan wiadin yadnya tiosan ring pura desa, kengin mendem tanpasadok, tur pamargine ke setra sesiliban karmbo antuk kulawarga, sane nyarengin mendem, nenten kalugra tangkil memadek ke pura sadurung tigang rahina wit saking mendem.

- (4) Prade wenten warga desa salah pati, ngulah pati patut pendem kadi sang seda biasa kadulirin antuk banten pangulap miwah panebusan.
- (5) Prade wenten warga seda mobot, patut bobotannyane kaembasang dumun wawu kapendem ring setra manut genah soang-soang.
- (6) Yan wenten anak seda nenten maagama Hindu, nenten dados mendem ring Setra Desa Adat.
- (7) Mendem sawa, wantah ring setra ugi sane sampun kamanggehang manut sastra agama.
- (8) Tan patut mendem sawa ring ulu Pura Prajapati.

Pawos 46

- (1) Jalaran sebel kamanggehang sekadi ring sor :

- ha. Sangkaning seda
- na. Sangkaning ngraja
- ca. Sangkaning ngembasang putra
- ra. Sangkaning kruron
- ka. Sangkaning nganten
- da. Sangkaning gamia gamana
- ta. Sangkaning salah timpal
- sa. Sangkaning wenten anak istri mobot tan kaupacarain pabiakawonan tur pawidi widana.
- wa. Sangkaning mamitra ngalang.
- la. Sangkaning wenten anak istri ngwetenang putra sadurung maupacara pabiakawonan tur pawidi widana.

- (2) Sengker sebel manut sekadi ring sor :

- ha. Kasedayan, kantos masapuh manut dresta;
- na. Ngaraja, tigang rahina ngawit saking ngraja wiadin selami ngraja jantos mabersih.
- ca. Ngembasang putra, 42 rahina (abulan pitung dina) ngawit putrane embas ngantos sampun kaupacara makamuhan tur mrayascita manut sekadi agama,
- ra. Kruron, 42 rahina (abulan pitung dina) tur sampun pamrayascita.
- ka. Pawiwahan, ngantos sesampune matirta pabiakawonan.

- da Gamia gamana, ngantos sesampune kapalasang / masapihan tur sampun kawentenang pamrayascita raga tur sampun kawentenang pamrayascita Desa Adat / Kahyangan.
- ta Salah timpal, kapuputang manut sastra agama.
- sa Anak istri mobot nenten kawentenang upacara pabiokawonan, ngantos kawentenang upacara pabiakawonan.
- wa Mamitra ngalang, ngantos kapalasang tur mrayascita manut sastra agama.
- la Ngembasang putra nenten kawentenang upacara pawidi widana, ngantos wenten sane mameras sang putra, tur sampun kawentenang upacara manut sastra agama.

(3) Sangkaning kasedayan :

ha Prade kapendem :

1. Banjar, tigang rahina rimusan mendem wiadin sampun polih prayascita (masapuh).
2. Kulawarganyane sajeroning pakarangan ngantos roras rahina.

na Prade kaabenang, Sang nyambut karya Pitra Yadnya cuntakannyane ngawit saking netegang rauh riwus yadnyanyane (mapegat).

ca Krama desa cuntaka ngawit saking mekarya rompok ngantos natab prayascita.

(4) Tan keni cuntaka luire :

ha Sulinggih

na Mangku Kahyangan Desa.

Pawos 47

(1) Atiwa-atiwa (pangabenan) kamargiang antuk :

ha Nyawa Resi

na Sawa Prateka

(2) Panemaya Pangabenan wenten kalih pawos :

ha Ngaben Dadakan

na Ngaben Masa

(3) Dudonan pangabenan ngawit saking ngagah wiadin seda, ngeseng ngantos pangiriman wiadi nganyut.

(4) Indik Ngaben :

- ha. Ngaben Dadakan, ngaben sane patut kasanggra sajeroning 7 (pitung) rahina ngawit seda. Ngaben dadakan kapatutang nuduk patus karya manut pamarginnyane. Upacara ngeseng sawa kapatutang mangda kasandang, tan kapatutang krama ngarap wiadin ngrusak sahananing upakara.
- na. Ngaben Masa, ngaben sane ngewangun / sajeroning nemu masa sasih karo. Ngaben masa patut nganutin kadi ring sor :
1. Ngaben kumpulan / klompok patut kaenterang olih prajuru desa kalaksanayang nyabran limang warsa manut pararem.
 2. Yening ngewangun ngaben ring Banjar, pepatusane nganutin dum-duman patus pesangon banjar soang-soang.
 3. Sadurung pangabenan, prajuru patut nureksain indik pamargin awige.
 4. Rikala ngemargiang sawa wiadin nyandang wadah sakeluirnyane, saha upakarannyane patut kadabdbabin mangda sami rahayu.
 5. Yening wenten pamargin ngaben ring dura desa sakewanten sawanyane magenah ring desa puniki, kapatutang keni upakara ring Pura Dalem, Pura Prajapati, tetaneman manut sastra agama.
 6. Yening wenten petempung ngaben kapatutang keni penanjung batu manut pararem.
- ca. Majenukan ring sang ngewangun Pitra Yadnya sajeroning desa adat puniki tan polih pengewales minakadi daging sok.

Pawos 48

(1) Papatusan Pangabenan wenten kalih pawos :

- ha. Ngaben masa luire : nasi apunjung (2 kg beras), klangsah akuub, turus / tiing akatih (manut pinunas sang madruwe yadnya).
- na. Ngaben dadakan, pateh sekadi patus seda kapendem.

(2) Pangingu ring krama banjar ngawit ngayah manut abot dangan kawentenan karya.

Palet 4
Indik Manusa Yadnya
Pawos 49

- (1) Manusa Yadnya inggih punika : upacara-upacara dharmaning manusa, ngawit saking patemoning kama bang lan kama petak, sajeroning garba ngantos seda riwekas.
- (2) Upacara kadi kecaping ajeng madudonan sekadi ring sor :
- ha. Magedong-gedongan weneng bobotan 5 (limang) sasih.
 - na. Duk rare medal.
 - ca. Kepus udel.
 - ra. Roras rahina.
 - ka. Tutug akambuhan (42 rahina).
 - da. Tigang sasih.
 - ta. Pawetuan / otonan.
 - sa. Mapetik (ngutang bok).
 - wa. Tutug kelih (ngraja sewala, ngraja singa).
 - la. Matatah (mapandes).
 - ma. Mawiwaha
- (3) Upacara-upacara inucap nista, madya, utama manut sastra agama.

Palet 5
Indik Bhuta Yadnya
Pawos 50

- (1) Bhuta Yadnya inggih punika upacara sane natetujon nyomeyang watek bhuta kala mangda dados bhuta kala hita.
- (2) Upacara ring sarwa prani luire :
- ha. Ring sarwa tumuwuh rikala tumpek pengatag.
 - na. Ring sarwa wewalungan rikala tumpek andang.
 - ca. Ring sarwa lalandep rikala tumpek landep.
- (3) Upacara pabiakala ring pertiwi, kahyangan, lan babhutan kawastanin caru.
- (4) Pacaruan inucap ring ajeng, Nista, Madya miwah Utama manut wiguna kadi ring sor :

- ha. Yadnya Sesa
- na. Segehan
- ca. Eka Sata
- ra. Panca Sata
- ka. Rsi Gana
- da. Panca Sanak
- ta. Panca Kelud
- sa. Tawur Agung
- wa. Balik Sumpah

Pawos 51

- (1) Ring Catus Pata (pempatan) rikalaning Tilem Kasanga kawentenang Tawur Kasanga.
- (2) Pananggal apisan sasih kadasa kabawos Nyepi, pinaka pengawit tahun isaka sane anyar, sane kamargiang antuk catur brata panyepian luire :
 - ha. Amati Geni
 - na. Amati Karya
 - ca. Amati Lelanguan
 - ra. Amati Lalungan
- (3) Catur Brata Panyepian kamargiang arahina saking jam 06.00 semeng jantos jam 06.00 semeng benjangannyane.
- (4) Sang mamurug kecaping ajeng keni pamidanda manut pararem.

PANCAMA SARGAH
SUKERTA TATA PAWONGAN

Palet 1

Indik Pawiwahan

Pawos 52

- (1) Pawiwahan inggih punika patemoning Purusa Pradana malapan panunggalan kayun suka cita kadulurin upa saksi sekala lan niskala.
- (2) Pamargin Pawiwahan luire :
 - ha. Papadikan.
 - na. Ngrorod.
 - ca. Nyeburin wiadin Nyentana.
- (3) Pidadab sang pacang mawiwaha patut :
 - ha. Sampun manggeh Daha Truna manut Undang-Undang Perkawinan saking Guru Wisesa.
 - na. Sangkaning pade seneng.
 - ca. Patut kariinin upacara sudi wadani prade pangambilane tios agama.
- (4) Pamargin pawiwahan mangda nganutin sastra agama, kategepin antuk undang-undang perkawinan saking Guru Wisesa.
- (5) Yan tan manut kadi kecaping ajeng tan kabawos sah.

Pawos 53

- (1) Pawiwahan sane kapatutang ring Desa Adat Tri Bhuana sekadi ring sor :
 - ha. Sampun kamargiang pabiakala saha kadururin antuk tri upa saksi.
 - na. Sampun matengeran suara kulkul.
- (2) Pawiwahan sane tan kadi kecaping ajeng, sinanggeh tan patut.

Pawos 54

Tata ara Pawiwahan

- (1) Sapa sira ugi pacang mawiwaha, kulawarganyane patut masadok ring prajuru yening pawiwahannyane papadikan.

(2) Pamargin papadikan manut dudonan sekadi ring sor :

ha Pakrunan jantos ping tiga, saha soang-soang malarapan :

1. Masedek, masarana antuk canang
2. Pangambilan, masarana pejati tur kesaksinin olih tri upa saksi.
3. Tipat Bantal, kabawos pamuput papadikan

(3) Prade ngrorod / ngrangkat patut :

ha Kaputusan lanange ngamargiang utusan sanistane sareng kalih .
pacang masujati wiadin mapecelek ring kulawarga istrinye.

na Mapalaku (ngluku).

ca. Mapradang (ngidih)

(4) Sajeroning paruman / panglukuan patut :

ha Kadulurin antuk geng pengampura majeng ring reraman wadone.

na Kaigumang bawos indik idih pekidih wiadin palegayan arep ring
pasewakan sang ngidih saha dewasa pakrabkambeane wekas.

ca Prade tankaterima pejatine, pakrunan kamargian jantos ping tiga.

(5) Pawiwahan nyeburin kacihnayang antuk langane pawakan predana istri
pawakan purusa, sane istri kamanggehang sentana rajeg sane lanang
kabawos pawiwahan nyeburin kadulurin antuk upacara manut sastra agama
saha kasaksian olih prajuru.

(6) Pawiwahan mapiteges puput yan sampun manut sekadi ring sor :

ha Ngamargiang jajauman pinaka pangraket pawiwahannyane miwah
pakulawargane.

na Ngaturang pejati ring merajan / kemulan wadone pacang mapamit
ring kawitannyane.

ca. Pawiwahan kabawosang sah :

1. Kasaksiang olih prajuru saha ngilikitayang
2. Kasaksiang krama banjar macihna antuk suaran kulkul.

Palet 2

Indik Nyapian

Pawos 55

- (1) Pawiwahan prasida wusan malarapan antuk palas marabian
- (2) Wusan mapikuren riantukan sinalih tunggil seda.
- (3) Palas marabian sangkaning wicara.
- (4) Sang ayat palas marabian patut atur supeksa pailikitan riin ring guru wisesa, risampun, tinas pamutuse wawu prajuru desa namyakang kawentenangnyane ring desa.

Pawos 56

- (1) Tata cara palas marabian sangkaning pada lila kadi ring sor :
 - ha. Nawur prabeya pasaksi sami matenga.
 - na. Pangunakayan polih pahan pada.
 - ca. Pabekel, tatadan soang-soang kakuasa niri-niri, miwah warisan kakuasa antuk kapurusa.
 - ra. Ngupajiwain pratisentana manut swadharmaning guru rupaka.
 - ka. Nawur pamidanda panebas kulkul manut pararem.
- (2) Jalaran nyapian sangkaning tan pada lila, luire :
 - ha. Nyasar laku, para dara, drati krama.
 - na. Kapunggelan idep rasa wiadin wandu.
 - ca. Matilar tan pasadok wiadin tan polih pengupajiwa langkungan ring 6 (enem) sasih miwah sane tiosan.
- (3) Prade riwekas sang palas kacihna adung malih, patut :
 - ha. Ngamargiang pawiwahan malih.
 - na. Kadanda nikel saking panebas suara kulkul kapertama katiwakang olih prajuru manut pararem.

Pawos 57

- (1) Sang balu kabinayang dados :
 - ha. Balu luh wit sentana rajeg wiadin balu luh boya sentana rajeg.
 - na. Balu muani kapurusa wiadin balu muani nyeburin.

(2) Swadharmaning balu inucap patut :

- ha. Ngamanggehang patibrata tan kengin mamargiang paradara / drati krama.
- na. Nguwasayang gunakarya, tan dados ngadol, ngadeang, makidiahang lan tiosan punika, sajawaning kabebasanang saking pianak wiadin kulawarga pinih tampek saking rabine prade okane kantun alit-alit.
- ca. Kengin ngidih sentane prade wenten pidadab sadurung sinalih tunggil seda, saha polih kebebasan manut aksara na.

(3) Balu kaucap tan pageh sakadi ring sor :

- ha. Drati krama wiadin paradara
- na. Matilar saking paumahan tan pasadok jantos 6 (enem) sasih.
- ca. Lempas ring swadharmaning balu.

Palet 3

Indik Sentana

Pawos 58

- (1) Sentana wenten kalih pawos, sane kaucap pratisentana miwah sentana paperasan.
- (2) Pratisentana inggih punika sentana sane metu saking pawiwahan kapatut.
- (3) Prade pawiwahan tan ngwetuang sentana kengin ngidih sentana antuk upasakti sekala niskala sane kawastanin sentana paperasan.
- (4) Sentana rajeg inggih punika, pratisentana wadon (pradana) sane kamaanggehan lanang. (purusa) duwaning ngalaksanayang pawiwahan kaceburin.
- (5) Sang sane kaarsayang dados sentana rajeg dudonanipun inggih punika :
 - ha. Pratisentana wadon tunggal wiadin sinalih tunggil sentana wadon sane mesemeton langkungan ring adiri.
 - na. Sampun kamanggehang dados pratisentana (purusa)
 - ca. Pawiwahan kaceburin kausahayang antuk jatma sane maagama Hindu wiadin jatma sane maagama tiosan sane sampun nglaksanayang pamarisuda raga wiadin sudi wadani.

ra. Sane ngamanggehang sentana rajeng patut mapasadok ring Prajuru Banjar tur Klian Banjar patut namyakang ring banjar saha ngaturang ring prajuru desa.

Pawos 59

- (1) Meras sentana patut kacihnayang antuk upacara miwah arta brana pamerasan, sane kasaksiang olih prajuru.
- (2) Sapa sira ugi pacang meras sentana patut mapasadok ring prajuru sanistane asasih sadurung pamerasan.
- (3) Klian Banjar sane ngangganin Bendesa, patut namyiakang ring sawidangan desa, sane tan lila mangda masengker kalih wuku sadurung pamerasan sampun mapasadok ring Bendesa Adat.
- (4) Prajuru Desa digelis maosin saha ngicenin pamutus manut dresta wiadin pararem.
- (5) Prade sulur paperasan tan manut kecaping ajeng, prajuru desa wenang ngandeg sang pacang ngemargiang paperasan, saha ngicenin pamutus mangda kapuputang riin sajeroning kulawarga.

Pawos 60

- (1) Paperasan sane kapaturang ring Desa Adat Tri Bhuana macihna antuk :
 - ha. Widi widana pamerasan.
 - na. Kasaksiang antuk prajuru desa sane makilingang wiadin ngilikitayang.
 - ca. Kadamyakang ring wawidangan desane.
- (2) Sane patut kaperas anggen sentana kadi ring sor :
 - ha. Jatma maagama Hindu.
 - na. Kulawarga saking purusa, prade tan wenten kengin saking wadon, yening taler tan wenten wawu kengin sekama-kama (saking kayun).
 - ca. Kautamayang saking waris kapurusa.
 - ra. Sinalih tunggil mawiwit saking kulawarga tunggal sanggah wiadin merajan paibon lan dadia, wiadin ngambil anak tios sakewanten sane manggama Hindu.
- (3) Kengin ngangkat sentana langkung ring adiri, lanang wiadin wadon.

Palet 4

Indik Warisan

Pawos 61

- (1) Warisan inggih punika artha brana saha ayah-ayahan ngupadi sukerta sekala niskala saking kaluhurannyane arep ring turunanyane.
- (2) Sane kaucap warisan luire :
- ha. Duwe tengah, makadi tegal ayahan desa, Kahyangan lan sane siosan.
 - na. Pangunakayan, tatadan / jiwa dana, hutang piutang.
- (3) Wawu kengin kabawos warisan prade wenten :
- ha. Sang mapiturun (pewaris).
 - na. Katurunan (ahli waris).
 - ca. Artha brana, tategenan (ayah-ayahan) maka cihna warisan.

Pawos 62

- (1) Ahli waris luire :
- ha. Pratisentana purusa.
 - na. Pratisentana (senana rajeg).
 - ca. Sentana paperasan lanarig / wadon.
- (2) Prade tan wenten sekadi ring ajeng, Kasinanggeh ahli waris :
- ha. Kualawarga purusa pernah ngunggahang makadi rerama lanang, pekak selanturnyane rerama misan, mindon.
 - na. Kulawarga purusa pernah kesamping makadi kaponakan dimisan miwah mindon.
 - ca. Yan tan wenten sekadi ring ajeng patut kawarisin antuk dadia paibon.
 - ra. Yan tan wenten dadia paibon patut kawarisin antuk banjar.
- (3) Swadharmaning ahli waris patut :
- ha. Nerima saha ngutsahayang tetamian pahan kaluhurannyane, makadi ngempon sanggah / mrajan, pura saha pangupakaranyane wiadin ayah-ayahan pawaris.
 - na. Nglaksanayang upacara pitra yaunya pawaris.

ca. Nawurin hutang-hutang pawaris manut panglokita.

Pawos 63

Mungguing waris kawaris ring Desa Adat Tri Bhuana.

- (1) Risampun kalaksanayang Pitra Yadnya lan hutang-hutang pawaris buntas katawur wawu warisan dados kepah.
- (2) Para ahli waris sami polih pahan sangkaning pagunakaya, sajawaning karang / tehal ayahan desa kaemong antuk ahli waris kasinenggeh krama ngarep.
- (3) Ahli waris sane tan patut ngewaris luire :
 - ha. Nilar kawitan lan sasaning agama.
 - na. Alpaka Guru Rupaka.
 - ca. Sentana rajeng kesah mawiwaha wiadin pratisentana nyeburin soang-soang kabawos ninggal kadaton.
- (4) Boya ahli waris nanging kengin muponin hasil dudonan, luire :
 - ha. Sentana luh, salami during kesah mawiwaha.
 - na. Balu luh wiadin muani nyeburin.
- (5) Pawaris kengin mapaweweh rikala maurip ring okane sane kesah mawiwaha pinaka jiwa dana, tatadan / bekel.

Pawos 64

- (1) Prade sajeroning pakulawarga wenten ahli waris langkungan ring adiri :
 - ha. Kawentenang paigum indik pedum waris inucap.
 - na. Yan tan prasida, patut katunasang tatimbang ring prajuru desa punika kengin katunasang ring guru wisesa.
- (2) Prade wenten karang kaputungan, prajuru desa patut nibakang ring :
 - ha. Sang sinanggeh ahli waris manut pawos 62.
 - na. Sang kengin anggen sentana manut pawos 60 (2) miwah (3) katunasang ring guru wisesa.
 - ca. Prade taler tan wenten cumpu ring panepas prajuru desa, wicara punika kengin katunasang ring Guru Wisesa

(3) Prade karang desa jantos kepah wiadin kasepih, patut soang-soang sang ngenahin nedunin makrama ngarep.

SAD SARGAH
WICARA LAN PAMIDANDA

Palet 1

Indik Wicara

Pawos 65

- (1) Sane wenang maosin makadi mutusang wicara ring desa inggih punika .
ptajuru desa kasinanggeh Kerta Desa.
- ha. Klian Banjar, prade sang mawicara sane patunggilan banjar.
 - na. Bendesa Adat, prade sang mawicara sami-sami rig panunggilan
Desa Adat.
- (2) Dudonan maosin saha muputang wicara warga desa kadi ring sor :
- ha. Kaping ajeng kabawosin antuk Klian Banjar.
 - na. Tan cumpu ring panepas Klian Banjar, katunasang ring panglingsir
Banjar.
 - ca. Paruman Banjar tan kanutin, kengin nunasang ring Bendesa Adat.
 - ra. Bendesa Adat tan prasida muputang, katincapang ring panglingsir
sinanggeh Kerta Desa.
 - ka. Prade taler pamuput panglingsir desa tan kacumpunin, katurang ring
paruman desa sinanggeh wasananing pamutus.

Pawos 66

- (1) Sahananing wicara mawiwit kacorahan sakaluire sinanggeh nungkasin
dading awig-awig, paswaran miwah pararem desa / banjar, prajuru patut
digelis maosin tan nyantos pasadok.
- (2) Sajaba wicara kadi ring ajeng patut nyantosang pasadok sang nunas baos.
- (3) Panepase patut pastika nyantenang iwang patut malarapan Tri Pramana
(saksi, ilikita, bukti) miwah tan maren nepak ring Catur Dresta.

Palet 2
Indik Pamidanda

Pawos 67

- (1) Desa / Banjar wenang niwakang pamidanda ring warga desa sane sisip.
- (2) Paniwak inucap kamargiang olih Bendesa / Klian Banjar.
- (3) Bacakan pamidanda luire :
 - ha. Ayahan punukan kasisipan.
 - na. Danda artha (dosa, danda, saha panikel paturunan).
 - ca. Rerampagan
 - ra. Kadaut karang ayahannyane, wiadin kasepekang.
 - ka. Panyanggaskara.
 - da. Kawaliang pipil nyane (kawusanang makrama)
- (4) Pamindanda sane katiwakang patut masor singgih ring kasisipane.
- (5) Jinah wiadin raja brana pamidanda ngranjingang dados driwen Desa / Banjar.

Pawos 68

- (1) Krama sane langkung ring tigang paruman nglantur tan naur urunan, tan naur kredit ring LPD, miwah dadendan wenang karampag manut pararam.
- (2) Rarampangan ngangge tata cara kadi ring sor :
 - ha. Kalaksanayang antuk prajuru kasarengin antuk karma desane tigang diri maka saksi.
 - na. Sang ngrampag saking darsana ngambil barang wiadin nyawenin tanem tuwuh, akehnyane manut ring hutang sang karampag.
 - ca. Prajuru miteketang mangda barang-barang sane karampag digelis katebus masengker tigang sasih ring arahina pacing kaadol.
 - ra. Tan nganinin saluwir barang sane patut inggilang manut agama miwah mademang pangupa jiwa.

Pawos 69

- (1) Prade sang Pacang karampang ngwara (ngalangin) Pamargi inucap makawita sampun lan ngarutin awig-awig desa wening karang desa sane kagenahin kadaul antuk desane wiadin kahoranyang
- (2) Samialih yan puruh talor ngalangin pamargi kadi ring ajeng lan winten pamargi bajawahing kawaliang pipihyane (kawusahang makrama)
- (3) Pamridanda inucap ring ajeng keri buntas disampun sang kekernin .
 - na Nuhas geng pengampura ring krama desa mantukan pinguak pasubaya (perarem) pecak.
 - na Nawut panganggan pinguak pasubaya duk pacang karampang kadulurin prayasotta

SAPTAMA SARGAH NGUWAH-NGUWUHIN AWIG-AWIG

Pawos 70

- (1) Nguwah-nguwuhin awig-awig desa puniki kamargiang antuk paruman desa.
- (2) Paruman inucap mangka kadasarin antuk prakarsan Krama Desa Adat yadiastun antuk prajuru sinunggal wiadin sinarengan.

Pawos 71

- (1) Sakaluring sane wenten sadurung nyane patut kaanutang ring sadaging awig-awig puniki.
- (2) Sakaluaraning sane durung kabaos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem-pararem.

ASTAMA SARGAH

SAMAPTA

Pawos 72

- (1) Awig-awig puniki kawastanin "Awig-awig Desa Adat Tri Bhuana".
- (2) Awig-awig puniki kamargiang ngawit kasungkemin utawi kararemin antuk Krama Desa Adat Tri Bhuwana
- (3) Awig-awig Desa Adat Tri Bhuwana puniki nganinin sahanning warga lan Krama Desa Adat miwah sahaning sane kakuwub antuk Desa Adat.


Pawos 73

- (1) Awig-awig puniki kasungkemin sajeroning paruman Desa Adat Tri Bhuwana nemonin rahina titi panglong ping sasih
lcaka Warsa Tanggal Masehi ring Bale
Banjar Tri Bhuana.
- (2) Awig-awig puniki kalingga tanganin olih Bendesa Adat, para Kelihan Banjar saha kasaksinin olih Kepala Dusun Bias, Kepala Desa Kusamba, Camat Dawan, tur kakukuhana olih Bupati Klungkung maka murdaning pamikukuh.

(3) Lwir. sang ngalingga tanganin


ha. Prajuru Desa Adat Tribhuwana :

Bendesa Adat Tribhuwana



I Nyeman Mujiانا

Kelihan Banjar Tribhuwana



I Wayan Sumandra

na. Kaping kalih Prajuru Desa Dinas maka saksi :

Kepala Dusun Bias

Drs. I Kadek Sudirta

Camat Dawan

Kepala Desa Kusamba

Drs. I Wayan Sujana
NIP. 600006335

Ida Bagus Suwitajaya

Ca. Bupati Klungkung maka murdaning pamikukuh
Kailikitayang ring Kantor Bupati Klungkung

Reg. Nomor :

Tanggal :

Mengetahui,
Bupati Klungkung

I WAYAN CANDRA

